

撰 然 凝 門 沙
義 要 宗 嚴 華

書 叢 小 學 佛

(要彙)

卷
之
四

行 印 局 書 學 佛 海 上

華嚴宗要義目次

序說

- | | |
|--------|--------|
| 一、教宗大意 | 二、教宗名義 |
| 三、立教開宗 | 四、一乘三乘 |
| 五、所立法義 | 六、本經次第 |
| 七、修證行相 | 八、諸法義門 |
| 九、章疏分量 | 十、祖承傳弘 |

佛學書局印刷發行 福州鼓山藏版

華嚴經疏論纂要 四八冊 定價洋三十二元

華嚴經疏論纂要一書。爲清順治時福州鼓山湧泉寺道霈禪師所撰。禪師于華嚴造詣最深。清涼疏鈔棗柏合論。研究幾三十年。因疏與論。旨趣不同。初學者難于會悟。且文理廣博。讀者苦其浩繁。禪師採其精要。折中而成。此書實佛學界空前絕後之巨著。清康熙十八年九月刊成。距今已二百五十一年。印刷無人。去年弘一上人遊鼓山湧泉寺發見此書刊版完全無缺。大喜。集資印二十五部。每部四十八冊。更珍者。此書未經編入日本續藏。故一經問世。購者紛紛。凡嚮往華嚴大寶者。不可不入此寶山法海也。

小叢書

華嚴宗要義

日本東大寺沙門凝然撰

序說

夫華嚴法界。難議難思。微塵攝於十方。剎那含於劫海。帝網珠內。現重重之影。錠光鏡中。示隱隱之像。相卽相入。攝體用之美。同體異體。窮鎔融之致。遊覺意之至道。初後圓通。入普眼之玄門。始終周滿。覺城之東。初心成正覺。妙峯之南。住位圓行德。一生備曠劫之因。一念昇究竟之果。一乘法義。融遍如是。今明普法。一乘教宗。

略立十門。示其塵露。一、教宗大意。二、教宗名義。三、立教開宗。四、一乘三乘。五、所立法義。六、本經次第。七、修證行相。八、諸雜法門。九、章疏分量。十、祖承弘傳。以此十門。粗陳宗旨。法林之中。僅舉一枝而已。

第一、教宗大意

問、以何義故名華宗嚴

答、以華嚴經爲所依教。建立義理。顯示旨歸。由此事故。名華嚴宗。大小諸宗。多由所依教。立名。如俱舍論。爲所依故。名俱舍宗。俱舍爲門。廣學有宗。諸部論藏。謂發智論。六足論。法勝毘曇。雜心毘

曇順正理論。顯宗論等。學此典也。舊名毘曇宗。習學八韃度論。舊婆沙論。舊俱舍等。此等諸論。其總名爲薩婆多宗。此云說一切有。以成實論爲所依教。名成實宗。四分律等。爲所依教。故名律宗。以中論。百論。十二門論三部。爲所依故。名三論宗。以眞言教。爲所依故。名眞言宗。陳說定判。有爲無爲。諸法性相。名法相宗。此就所立所說爲名。或名唯識宗。約所立義故。若能詮教唯識藏故。雖唯識論。爲初學門。瑜伽大論。十支諸論。皆咸習學。窮義理故。或名應理圓實宗。所說法義。與理相應。世俗勝義。四種道理。三性。三無性。乃至二空。所顯眞理。冥會契合。如是等理。圓滿眞實。名應理圓實宗。

或名普爲乘教。第三時教。普爲發趣一切乘者。說此教故。一切乘者。卽是所被三乘五乘種種機故。若依根本所依論教。名瑜伽宗。解深密經。瑜伽大論。是本所依。以此爲門。十支諸論。及其釋論。大乘法相。皆爲所學。就所住處。名天台宗。若依所依。名法華宗。如是宗名。多依所學。或據餘門。各立名字。此華嚴經。如來成道最初演說法界圓融。十十無盡。主伴具足。相卽相入。無礙法門。爲諸教源。爲諸乘本。

問。何故如來。初說此教。

答。如來成覺。朗照萬法。以一切智。一切種智。無障礙智。現證真理。

事法妙境。理智冥一。究竟圓滿。以自所證。爲物示此。是故不起自
內證處。全如自證。說其法體。是故卽於成正覺處。菩提樹下。最初
說此自證法界。若餘處說者。容非自證。故三乘教。移處說之。表
非如來自所證故。是故諸佛法爾。最初要說甚深廣大法門。賢首
大師作探玄記。建立十意。陳教興義。清涼大師作新經疏。教因教
緣。各開十門。元曉惠苑。各陳教興。本經別有性起出現。性起總相
專明興意無量因緣。如來出世。出現本意。爲說一乘圓融法界大
華嚴故。

問、爲何等機說大華嚴。

答、此經必爲一乘普機。演說一切圓極普法。譬如日出。先照高山。所說法門。名日光教。所被根緣。名高山機。

問、若爾此教唯被圓機。應不攝引三乘小乘。

答、非圓機者。不能受此法。如來自證法體究極。圓通無礙。普遍周滿。與此普法能相應者。得受如是最極圓法。二乘三乘既非此器。是故聲聞衆雖在第八會。如聾如盲。懸隔見聞。三乘菩薩雖無量億那由他劫修習六度。普機未熟。故不能入此法。

問、此教既不被三乘小乘等。法有不攝萬機之過。攝二乘等爲教深廣。今教唯攝一乘普機不攝二乘。豈爲普法。

答。法是深奧。佛所證故。二乘不堪。如聾如盲。不能見聞。如來境界。非法不攝。非教漏機。根未熟故。不能頓入。若令二乘三乘等聽此。華嚴者。卽非華嚴。亦非一乘。圓融普法。應同三乘小乘等教。云何令此不可思議自在法門同小乘乎。

問。若爾此教。應永棄捨三乘等類。若有攝誘小機門耶。若攝之者。有何方便。

答。普法圓教。是不共故。三乘小乘。不能見聞。雖直不聽。不捨聞性。其聞性者。別教一乘大方便門。二乘三乘。由此迂迴得入圓教。於此一乘別教之法。流出三乘小乘等法。由此方便。漸漸誘引。練磨。

長養。說人乘法。令離惡趣。說天乘法。令出人乘。以二乘法。令離人天。攝愚法小乘。令入大乘。大乘教中。具說三乘。以引愚法。令迴心。故迴心教中。聲聞斷證。超越愚法。彼諸聲聞。漸入三乘大乘共教。方作信解大乘菩薩。如是陶練。心志融暢。長養根機。堪入一乘。是故開顯三乘異門。會歸一乘真實大道。開會三乘。爲入一乘門。然後得入別教一乘。舍那自體。普賢法界。別教一乘。是所入法。三乘同會。爲能入門。同會之位。一乘所立。有同三乘。名同教一乘。同教一乘。所入之時。所立法義。全別三乘。名別教一乘。是故如來出世本意。爲令衆生。悟入別教。普法一乘。圓融大道。

問。入別教者。有幾許類。

答。有二類機。入別教法。一。頓入一乘機。成道最初。說華嚴經。不簡凡夫。及以聖人。初心後心。皆一乘機。皆得悟解。二。漸入一乘機。二乘三乘。根緣不堪。不能頓入別教普法。如來愍彼。於一分三。漸次誘引。入於別教。爲頓入者。初說一乘七處八會。次第經歷。橫遍十方。堅該十世。一切法門。第二七日。宣示顯說。究竟窮盡。爲漸入者。從一乘法。流出三乘。鹿苑已後。漸次化機。從此生起。終摺拾教。此漸入法。第二七日。一念之中。所顯現法。海印三昧。威神力故。所現無遺。皆悉說盡。從此所現別教法中。隨機任宜。摘出三乘。漸次誘

攝廻轉入本。漸入之者。廻轉入一。五所爲中。名爲轉爲。轉小入三。轉三入同。從同入別。敎一乘。如是展轉。名曰轉爲。漸入之者。如是展昇。終入法界圓融本處。性起大樹。二乘闡提。二處不生。而不舍生芽之性。聲聞乘人。於此普法。生佛芽種。終成覺樹。玄記第一云。謂諸二乘。以鈍根故。要先廻入共敎大乘。捨二乘名。得菩薩稱。然後方入此普賢法。當知一切二乘。總無頓入普賢法界。依究竟說。無有二乘。而不廻入共敎菩薩。無彼菩薩。而不入此普賢之法。是故展轉皆入此法。言共敎大乘者。正指始敎三乘。轉入於大乘。惠苑法師陳云。要先廻入權敎大乘。餘卽同此。入於三乘。必經同敎。

方入別教。同教爲能入門。住所入別教故。

問。何故華嚴名爲本教。

答。諸教本故。諸佛本故。萬能本故。萬行本故。諸乘本故。出所本故。所歸本故。攝末本故。能證本故。所證本故。此諸義中。肝要有二。一開漸本。性起品說。日照譬故。故法華云。於一佛乘分別說三。於華嚴經別教一乘。開分三乘漸悟門故。二攝末本。二乘三乘。長養機根。終入別教圓融都故。法華經中。誦出菩薩有四唱。尋問訊如來。衆生易度不勞否等。如來答言。此諸衆生。始見我身。聞我所說。卽皆信受。入如來慧。除先修習學小乘者。如是之人。我今亦令得聞。

是經入於佛慧。演義鈔一下云。華嚴未有末之可攝。以法華攝末歸本。歸華嚴故。此明華嚴攝末之本。演鈔又云。吉藏引此立三種法輪。第一名根本法輪。第二名枝末法輪。第三名攝末歸本法輪。吉祥依此誦出品文。立三轉法輪。收攝如來一代諸教一類。所見化儀根本法輪。是華嚴經。鹿苑已後。法華已前。是三乘枝末法輪。法華是攝末歸本法輪。清涼大疏引誦出文。結成華嚴是根本義。又法華第一云。於一佛乘。分別說三。亦是從本流末。卽指華嚴爲一佛乘。分別說昔之三。三卽鹿野四諦等。若既不指華嚴爲本。鹿野之前。以何爲一乘耶。此是釋成攝末之本。其漸入者。先小後大。

先三後一。終入別教。開漸本者。出現所說四照大喻。一先照高山。被菩薩故。說華嚴故。此中直舉一乘菩薩。兼攝三乘教中菩薩。次照黑山。譬緣覺乘。三照高原。譬聲聞乘。四照大地。譬善根衆生。乃至邪定。開漸次第。先大後小。約別異人。次第開漸。鈔云。始成便說華嚴。是照菩薩山王。此明先大後小。其攝末相。先小後大。一人昇進至一極故。

問。開漸攝末約何等機。

答。其頓入者。一切萬法。本來一乘。究竟圓融。永無開漸三乘差異。無開漸故。無有先小後大等門。進入之義。普賢淨眼。雖有諸乘。本

來不異別教一乘。不見小乘如聾如盲。不同小乘三乘教等。專立三乘。名明因果。不同同教。開會三乘。同三明一。待對說一。別教一乘。本無聲聞。雖有聲聞。是盧舍那。不見不聞聲聞名體。本來普徧。一乘道故。

問華嚴別教。云何攝引三乘教中菩薩乘人。

答。別教當體全異三乘。而亦約熟。必入別教。而所引菩薩。有其二類。一直進菩薩。本是三乘菩薩乘機。依圓教中行布一門。發心修行。行解長養。根緣調熟。卽入圓融。二廻心菩薩。亦名二乘。本是愚法。初聞大乘。信解勝進。卽成廻心。志意通暢。作菩薩分。已入共教。